



Rannsóknarleyfi
vegna áætlunar um virkjun á efri hluta vatnasviðs Skjálfandafljóts í Þingeyjarsveit

Í samræmi við 4. gr. laga um rannsóknir og nýtingu á auðlindum í jörðu nr. 57/1998 og með vísan til 40. gr. raforkulaga nr. 65/2003 veitir Orkustofnun hér með Landsvirkjun., kt. 420269-1299, og Hrafnabjargavirkjun hf. kt. 430205-0210, hér eftir sameiginlega nefndum leyfishafi, rannsóknarleyfi vegna áætlana um virkjun á efri hluta vatnasviðs Skjálfandafljóts í Þingeyjarsveit.

Við undirbúning að útgáfu leyfis þessa lágu fyrir umsagnir Umhverfisstofnunar og Náttúrufræðistofnunar Íslands í samræmi við 4. mgr. 5. gr. laga um rannsóknir og nýtingu á auðlindum í jörðu nr. 57/1998. Með vísan til 13. og 14. gr. stjórnáætlunarlaga nr. 37/1993 var leitað umsagnar landeigenda, og að auki sveitarfélagsins Þingeyjarsveitar, og afstaða tekin til þeirra umsagna.

1. gr.

Almennt

Leyfið felur í sér heimild til handa leyfishafa til að framkvæma mælingar og rannsóknir á viðkomandi svæði á leyfistímanum í samræmi við rannsóknaráætlun, sbr. 3. gr. leyfisins.

Leyfið felur hvorki í sér heimild til nýtingar eða virkjunar á vatnasviði rannsóknarsvæðisins, né forgang til slíkrar nýtingar eða fyrirheit um virkjunarleyfi. Vatnasvið Skjálfandafljóts í Þingeyjarsveit er í biðflokki sbr. þingsályktun nr. 13/141 um áætlun um vernd og orkunýtingu landsvæða (rammaáætlun) frá 14. janúar 2013 og ákvæði laga nr. 48/2011 um verndar- og orkunýtingaráætlun. Komi til nýtingar þarf umrætt svæði að flytjast í orkunýtingarflokk rammaáætlunar, auk þess sem leyfishafi þarf að sækja um



sérstakt virkjunarleyfi og ná samkomulagi við umráðahafa vatnsréttinda á svæðinu um endurgjald fyrir auðlindina eða afla sér eignarnámsheimildar ella.

2. gr.

Gildistími

Leyfið gildir frá 19. júní 2013 til 31. desember 2017, enda hafi leyfishafi lagt fram tryggingu, sbr. 14. gr. leyfis þessa.

Rannsóknir leyfishafa eða undirbúningur þeirra skal hefjast innan fjögurra mánaða frá útgáfu leyfisins og ljúka fyrir 31. desember 2017.

3. gr.

Rannsóknaráætlanir

Leyfishafa ber að haga rannsóknum á leyfissvæðinu í samræmi við umsókn sína sem er fylgiskjal (fskj. 1) með leyfi þessu. Hann skal árlega gera Orkustofnun grein fyrir niðurstöðum rannsókna og gera jafnframt grein fyrir endurskoðun á áætlun um rannsóknir sínar á leyfissvæðinu ef um veruleg frávik er að ræða frá upphaflegri áætlun eða rannsóknir auknar frá því sem gert var ráð fyrir í rannsóknaráætlun.

Leita skal samþykkis Orkustofnunar ef verulegar breytingar verða á gildandi rannsóknaráætlun.

4. gr.

Staðarmörk svæðis

Leyfið tekur til svæðis á efri hluta vatnasviðs Skjálfafljóts í Þingeyjarsveit í Þjóðlendu og í landi jarðanna Mýrar, Stóru Tungu, Sörlastaða, Bólstaðar, Svartárkots og Víðikers sem afmarkast af eftirfarandi hnitum (ÍSN93 viðmiðun) og sýnt er á meðfylgjandi korti (fskj. 2).

Nr.	X	Y
1	555471	482170
2	555282	496818
3	575505	544542
4	582404	544826
5	581743	526586
6	565866	496156
7	565016	481887

Komi til þess að leyfishafi telji sig þurfa að víkka út rannsóknarsvæðið, ber honum að leita samþykkis Orkustofnunar um slík áform, sbr. 3. gr.

5. gr.

Mat á umhverfisáhrifum, skipulag og starfsleyfi

Framkvæmdir á rannsóknarsvæðinu kunna, eftir atvikum, að vera háðar mati á umhverfisáhrifum, sbr. lög nr. 106/2000. Rannsóknarleyfi þetta er háð því að farið hafi verið að framangreindum lögum áður en

fyrirhugaðar framkvæmdir á rannsóknarsvæðinu hefjast. Aðrar framkvæmdir rannsóknarleyfishafa kunna, eftir atvikum, að vera háðar lögum um mat á umhverfisáhrifum.

Skipulagsskyldar framkvæmdir á vegum leyfishafa skulu vera í samræmi við skipulagsáætlanir, sbr. skipulagslög nr. 123/2010.

Leyfishafi skal afla starfsleyfis hjá viðkomandi heilbrigðisnefnd vegna jarðborana, sbr. reglugerð nr. 785/1999.

6. gr.

Réttindi leyfishafa

Landeiganda eða umráðamanni lands er skylt að veita leyfishafa óhindraðan aðgang að eignarlandi því sem í hlut á og ber landeiganda eða umráðamanni að hlíta hvers konar afnotum af landi, takmörkun á umráðarétti og óþægindum sem nauðsynleg eru vegna rannsóknar í samræmi við leyfi þetta, sbr. 1. og 2. mgr. 26. gr. laga nr. 57/1998.

7. gr.

Skyldur leyfishafa

Við rannsóknir samkvæmt leyfi þessu skal leyfishafi gæta þess að framkvæmdir valdi hvorki mönnum, munum né búpeningi hættu eða skaða. Jafnframt skal leyfishafi gæta þess að valda ekki mengun og spjöllum á lífríki að óþörfu. Þá skal leyfishafi forðast eins og kostur er að skerða heildarsýn náttúruminja og náttúrufars á svæðinu, sbr. ákvæði 8. gr. leyfisins.

Leyfishafi skal við framkvæmdir á sínum vegum, sem ætla má að hafi áhrif á nýtingu annarra aðila, taka tillit til og hafa samráð við aðila sem stunda nýtingu í nágrenni rannsóknarsvæðisins.

8. gr.

Vernd og frágangur starfsstöðva og svæðis

Um vernd rannsóknarsvæðis gilda, auk laga um rannsóknir og nýtingu á auðlindum í jörðu, lög um náttúruvernd, nr. 44/1999, einkum ákvæði 17., 34., 35., 37. og 38. gr. laganna. Leyfishafa ber í hvítetna að fara að lögum í umgegni um rannsóknarsvæðið.

Leyfishafi skal taka tillit til umhverfissjónarmiða við rannsóknir og framkvæmdir sem og við frágang að þeim loknum.

Leyfishafi skal fjarlægja á sinn kostnað öll mannvirki og skilja við svæðið, svo sem kostur er, í sama ásigkomulagi og fyrir framkvæmdir. Þá skal leyfishafi standa þannig að framkvæmdum að þær hafi sem minnst rask í för með sér og skerði ekki verndargildi svæðisins og að gætt verði að sjónrænum áhrifum við framkvæmdir.

9. gr.

Eftirlit

Orkustofnun hefur, samkvæmt 21. gr. laga nr. 57/1998 eftirlit með framkvæmd leyfis þessa. Áður en leyfishafi hefur rannsóknir á grundvelli leyfis þessa skal hann gera samkomulag við Orkustofnun um eftirlit þar sem gera skal grein fyrir umfangi eftirlits og kostnaði við það. Nota skal innra eftirlit leyfishafa eftir því sem nokkur kostur er.

Verði settar reglur um framkvæmd eftirlits með rannsóknar- og nýtingarleyfum á gildistíma leyfisins skulu þær gilda um eftirlit með framkvæmd þessa leyfis.

Orkustofnun mun hafa samráð við Umhverfisstofnun og aðra opinbera aðila eftir því sem þörf krefur varðandi framkvæmd eftirlits.

Leyfishafi greiðir allan kostnað af eftirliti samkvæmt samningi.

10. gr.

Upplýsinga- og tilkynningarskylda

Leyfishafi skal 1. maí ár hvert og við lok leyfistíma senda Orkustofnun skýrslu þar sem fram koma upplýsingar um niðurstöður rannsókna ásamt upplýsingum um eðli og umfang auðlindarinnar. Leyfishafi skal að öðru leyti fara að ákvæðum 22. gr. laga nr. 57/1998 varðandi upplýsingagjöf og tilkynningarskyldu.

Nánar er kveðið á um þessi atriði í Viðauka II, við rannsóknarleyfi þetta. (fskj. 3).

Upplýsingar, sem rannsóknarleyfishafi veitir Orkustofnun eða öðrum opinberum aðilum samkvæmt auðlindalögum um rannsóknir svo og niðurstöður rannsókna á innsendum sýnum, eru bundnar trúnaði á gildistíma leyfisins, svo og á gildistíma nýtingarleyfis, komi til útgáfu slíks leyfis.

Verði virkjunarleyfi gefið út til leyfishafa í kjölfar þessa leyfis fellur trúnaðarskylda varðandi framangreind gögn niður fimm árum eftir að gildistíma leyfisins lýkur, og er þá Orkustofnun heimilt að láta umrædd gögn í té og/eða nýta þau í þágu frekari leyfisveitinga.

11. gr.

Skaðabótaskylda

Leyfishafi er skaðabótaskyldur vegna tjóns sem hlýst af starfsemi á grundvelli leyfis þessa í samræmi við almennar reglur skaðabótaréttarins. Áður en leyfið er veitt skal leyfishafi sýna fram á að hann hafi tryggingu hjá viðurkenndu tryggingafélagi vegna tjóns sem kann að hljótast af starfsemi hans almennt.

12. gr.

Framsäl

Leyfi þetta verður ekki framselt né má setja það til tryggingar fjárskuldbindingum nema með leyfi Orkustofnunar, sbr. 32. gr. laga nr. 57/1998.

13. gr.

Afturköllun

Orkustofnun getur afturkallað leyfið ef leyfishafi fylgir ekki þeim skilmálum sem settir eru í leyfi þessu eða lögum og reglugerðum sem það byggir á, sbr. 20. gr. laga nr. 57/1998 eða samningum sem tengjast leyfinu.

Verði eftirlitsaðili var við brot leyfishafa á lögum, reglugerðum eða ákvæðum leyfis þessa skal hann þá veita leyfishafa skriflega aðvörun og frest til úrbóta. Sinni leyfishafi ekki slíkri aðvörun skal afturkalla leyfið. Sama á við ef vikið er frá samkomulagi skv. 9. gr. leyfisins.

14. gr.

Önnur leyfi

Leyfi þetta er háð almennum gildandi réttarreglum á hverjum tíma. Um rannsóknir samkvæmt leyfinu gilda auk laga nr. 57/1998, náttúruverndarlög, nr. 44/1999, skipulagslög, nr. 123/2010, þjóðminjalög, nr. 107/2001 auk annarra laga er varða rannsóknir á jarðrænum auðlindum.

Leyfi þetta undanþiggur ekki leyfishafa frá því að sækja um leyfi vegna starfsemi sinnar sem að öðru leyti

er mælt fyrir um í lögum nr. 57/1998 eða öðrum lögum sem starfsemin fellur undir.

Áður en framkvæmdir hefjast skulu önnur leyfi sem lög kveða á um liggja fyrir, svo sem framkvæmdaleyfi og byggingarleyfi viðkomandi sveitarstjórnar, sbr. ákvæði skipulagslaga, nr. 123/2010.

15. gr.

Leyfisgjald

Leyfishafi skal greiða kr. 41.500 gegn afhendingu leyfisbréfs þessa, sbr. 34. tölul. 11. gr. laga um aukatekjur ríkissjóðs, nr. 88/1991, með áorðnum breytingum.

Reykjavík, 19. júní 2013



Guðni A. Jóhannesson
orkumálastjóri

Fylgiskjöl:

1. Umsókn Landsvirkjunar og Hrafnabjargavirkjunar hf. ásamt viðaukum
2. Viðauki I, kort af rannsóknarsvæðinu
3. Viðauki II um gagnakröfur vegna eftirlits Orkustofnunar